



## **ADRODDIAD BLYNYDDOL LLAWN I RIENI / GWARCHEIDWAID 2019-2020**

**Annwyl Riant / Warcheidwad,**

Rwy'n falch iawn fel Cadeirydd y Corff Llywodraethol i gyflwyno adroddiad blynyddol ar gyfer Ysgol Gymraeg Aberystwyth.

Hoffwn achub ar y cyfle i ddiolch i'r Pennaeth, y Dirprwy, yr holl athrawon, cynorthwywyr dysgu, staff ategol, y rhieni / gwarcheidwaid ac wrth gwrs y disgyblion am eu gwaith caled dros y flwyddyn, ac am chwarae eu rhan yn llwyddiant cyson yr ysgol.

Rwy'n siŵr fy mod yn siarad ar ran y Cordd Llywodraethol i gyd wrth fynegi fy malchder yn y cyfleoedd ardderchog sy'n cael eu cynnig i'r holl ddisgyblion, a'r ymdrech i dynnu sylw at dalent a diddordeb arbennig pob plentyn. Diolch eto i'r tîm staff am eu hymdrechion ac ymroddiad sicrhau'r cyfleoedd hynny.

Rydym yn achub ar bob cyfle i bwysleisio nodau'r Ysgol - Cymreictod, Parchu ein gilydd a Gwneud ein gorau glas – ac mae'n amlwg bod rhain yn parhau i ddylanwadu'n bositif ar y disgyblion ac yn cael effaith ar bawb sy'n gysylltiedig â'r sefydliad unigryw hwn.

O ganlyniad i'r safonau dysgu ac addysgu uchel sy'n bodoli mae'r ysgol wedi ei chategoreiddio fel ysgol werdd gan Lywodraeth Cymru ac yn gweithredu fel ysgol Arloesol.

Mae niferoedd y disgyblion sy'n mynychu'r ysgol yn parhau'n gyson gyda'r nifer yn gyson uchel. Roedd 435 o ddisgyblion yn mynychu'r ysgol ym Mis Gorffennaf 2019 gyda Phennaeth, Dirprwy Bennaeth, 15 athrawon amser llawn amser a 6 o athrawon rhan amser. Mae tri aelod o'r staff yn gweithredu fel Penaethiaid Adran yn y Cyfnod Sylfaen, Cyfnod Allweddol 2 a'r Adran Anghenion Dysgu Ychwanegol. Mae gan yr ysgol dîm effeithiol o Gynorthwywyr sy'n cynorthwyo yn y Cyfnod Sylfaen ac yn cefnogi disgyblion sydd ag Anghenion Dysgu Ychwanegol.

Mae gan yr ysgol griw gweithgar o staff ategol sy'n cefnogi'r gwaith o ddarparu'r cyfleoedd gorau i'r disgyblion. Mae'r tîm yn cynnwys ysgrifenyddes, gofawr, tri o lanhawyr, pump o gynorthwywyr cinio a phump o staff yn y gegin.

Amser a lleoliad y Cyfarfod - Mae'r gofynion ar gyfer yr angen i gynnal Cyfarfod Blynyddol y Llywodraethwyr wedi newid (gweler y manylion isod). Serch hynny mi fyddwn yn darparu cyfle i drafod materion sy'n ymwneud â'r ysgol, gwaith y llywodraethwyr a'r Awdurdod Addysg fel rhan o Gyfarfod Blynyddol y Gymdeithas Rieni ac Athrawon a gynhelir yn yr ysgol Gymraeg ar nos Lun, Medi 30ain am 6 o'r gloch. Mi fyddaf fel Cadeirydd yn bresennol yn ystod y cyfarfod.

Ni fu galw dros gynnal cyfarfod o'r Llywodraethwyr gyda'r Rhieni yn unol ag adran 94 o Ddeddf Safonau a Threfniadaeth Ysgolion (Cymru 2013) yn ystod y flwyddyn addysgol 2016-17.

Gweler y manylion isod sy'n tynnu sylw at ofynion cynnal cyfarfod blynyddol.

### ***Newidiadau i gyfarfodydd Blynyddol y Rhieni / Llywodraethwyr***

*Mae Adran 94 y Ddeddf Safonau a Threfniadaeth Ysgolion (Cymru) 2013 (y Ddeddf) yn gwneud newidiadau pwysig i'r trefniadau deddfwriaethol blaenorol oedd yn ymwneud â Chyfarfodydd Blynyddol y Rhieni/Llywodraethwyr. Mae'n darparu trefniadau newydd lle gall rhieni ofyn am gyfarfod gyda chorff llywodraethol.*

*Fodd bynnag, bydd angen i'r rhieni fodloni pedwar (4) gofyniad statudol wrth alw cyfarfod sef:-*

- (i) rhaid i rieni 10% o'r disgyblion cofrestredig, neu rieni 30 o'r disgyblion cofrestredig (pa un bynnag sydd isaf) arwyddo deiseb yn gofyn am gyfarfod;*
- (ii) rhaid mai diben y cyfarfod yw trafod materion sy'n ymwneud â'r ysgol;*
- (iii) y nifer fwyaf o gyfarfodydd y gall rhieni ofyn amdanynt o fewn unrhyw flwyddyn ysgol yw tri (3);*
- (iv) rhaid bod yna ddigon o ddiwrnodau ysgol ar ôl yn y flwyddyn ysgol i ganiatáu cyfarfod.*

*At hynny:-*

- (a) rhaid cynnal y cyfarfodydd cyn diwedd cyfnod o 25 niwrnod;*
- (b) mae'r cyfnod o 25 niwrnod yn cychwyn y diwrnod ar ôl derbyn y ddeiseb, ond nid yw'n cynnwys unrhyw ddiwrnod nad yw'n ddiwrnod ysgol;*
- (c) os oes angen cynnal cyfarfod arall o ganlyniad i ddeiseb wahanol, ni fydd y cyfnod o 25 niwrnod yn dechrau tan y diwrnod ar ôl cynnal y cyfarfod arall;*
- (ch) rhaid bod digon o ddyddiau ar ôl yn y flwyddyn ysgol i gynnal cyfarfod cyn diwedd y cyfnod o 25 niwrnod;*
- (d) bydd cyfarfodydd yn agored i holl rieni'r disgyblion cofrestredig yn yr ysgol, y Pennaeth ac unrhyw un arall a wahoddir gan y corff llywodraethol;*
- (dd) mae'n rhaid i hysbysiad y cyfarfodydd i'r rhieni gynnwys dyddiad, amser a lleoliad y cyfarfod ynghyd â'r mater neu faterion i'w trafod.*

Y mae copi o'r adroddiad hwn ar gael yn Adran y Llywodraethwyr ar safle we'r ysgol - [www.ysgolgymraeg.ceredigion.sch.uk](http://www.ysgolgymraeg.ceredigion.sch.uk) <<http://www.ysgolgymraeg.ceredigion.sch.uk/>>.

Clerc y llywodraethwyr - Adran Addysg Cyngor Sir Ceredigion, Canolfan Rheidol, Rhodfa Padarn, Llanbadarn Fawr, Aberystwyth, SY23 3UE.

Cadeirydd y llywodraethwyr – Mr Owain Schiavone. [owssgiv@hotmail.com](mailto:owssgiv@hotmail.com)

Trefniadau etholiad nesaf y Corff Llywodraethol – mi fydd yr Awdurdod Addysg a'r ysgol yn hysbysu rhieni / gwarcheidwaid am drefniadau unrhyw gyfleoedd i fod yn rhan o'r Corff Llywodraethol a threfniadau etholiadau.

Hyfforddiant Mewn Swydd - gellir cael manylion llawn o'r cyrsiau a fynychwyd gan y staff rhwng Medi 2017 a Gorffennaf 2018 o'r ysgol. (gweler enghreifftiau o'r cyrsiau isod) Carwn ddiolch i'r staff am fynychu'r cyrsiau hyn.

Dyma flas o'r Hyfforddiant Mewn Swydd a fynychwyd;

Hydref 1af	Staff ysgol gyfan	Defnydd o epi pen mewn argyfwng
Hydref 3ydd	Pennaeth	Adolygiad person canolog
Hydref 9fed	Holly Richards a Rachel Hull	Cyfnod Sylfaen Modiwl 2
Hydref 10fed	Llŷr Evans	Ysgolion Arloesol
Hydref 24ain	Staff Bl 3 a 4	Mathemateg gyda Liwsi Harries
Tachwedd 16	Ysgol gyfan	Datblygiadau Lles ar gyfer ysgolion cylch Aberystwyth
Tachwedd 30ain	Cathryn Pridmore	Awtistiaeth
Rhagfyr 10fed	Pennaeth	Academi – Caerdydd
Rhagfyr 12fed	Llŷr Evans	Arloesi'r cwricwlwm yn y Drenewydd
Ionawr 15fed	Cynorthwyr ADY	Hyfforddiant 'P levels'
Ionawr 18fed	Pennaeth	Cyfarfod Penaethiaid Aberystwyth
Ionawr 21ain	Holl athrawon-Rhannu Dysg 1	Cyfle i athrawon arsylwi ar arferion addysgu ei gilydd.
Ionawr 23ain	Nia Roberts	Arweinyddiaeth y cyfnod sylfaen
Ionawr 28ain	Holl athrawon – Rhannu Dysg 2	Cyfle i athrawon arsylwi ar arferion addysgu ei gilydd.
Ionawr 29ain a 30ain	Cathryn Pridmore	Cwrs ADY
Chwefror 4ydd	Rhannu Dysg 3 – Holl athrawon	Cyfle i athrawon arsylwi ar arferion addysgu ei gilydd.
Chwefror 5ed	Eleri Evans a Lowri Owen	Pencampwyr awtistiaeth
Chwefror 11	Rhannu Dysg 4 Holl athrawon	Cyfle i athrawon arsylwi ar arferion addysgu ei gilydd.
Mawrth 15fed	Llŷr Evans	Cyfarfod Ymchwil Met Caerdydd
Ebrill 3ydd	Rachel West	HLTA
Ebrill 8fed	Cathryn Pridmore	ADY Aseidiadau personol
Ebrill 29ain	Staff Ysgol gyfan	Cyflwyniad i'r Cwricwlwm Newydd a thasgau cyfoethog.
Mai 15fed	Pennaeth	Gwerthuso'r cwricwlwm Newydd yn Llandrindod
Mehafin 4ydd		Ymweliad 2 yr Awdurdod Addysg
Mehafin 14eg	Pennaeth	Paratoi ar gyfer hyfforddi Cohort 2 gyda'r Academi
Mehafin 17eg ac	Llŷr Evans	Cyflwyniad am y Celfyddydau Mynegiannol fel rhan o

18fed		sioe deithiol y Cwricwlwm Newydd.
Mehefin 27ain	Gareth James	Gweithdy Ehedlin

## Cyfleoedd i rannu Arferion da gydag ysgolion a sefydliadau

Yn sgil ein cyfrifoldeb fel Ysgol Arloesol ac un sy'n cydweithio gyda Llywodraeth Cymru i ddatblygu'r Cwricwlwm Newydd cafwyd nifer o gyfleoedd i rannu arferion da gydag ysgolion ar draws Cymru. Cafwyd cyfle i rannu datblygiadau mewn cynhadledd genedlaethol Estyn yng Nghaerdydd. Bu Pwyllgor John Furlong a Phrifysgol Aberystwyth yn rhan o gydweithio cadarnhaol iawn i rannu arferion diweddaraf wrth hyfforddi darpar athrawon y dyfodol. Ym mis Medi 2019 mi fydd yr ysgol yn gweithredu fel ysgol arweiniol gydag Aber Addysgu+.

### Cyfarfod Blynyddol (Hydref 2018)

Nid oedd galw am gyfarfod yn ystod Hydref 2018. Fodd bynnag cafwyd cyfle i drafod datblygiadau'r ysgol yn ystod Cyfarfod Blynyddol y Gymdeithas Rieni ac Athrawon - rhoddwyd cyflwyniad am feysydd penodol yn ymwneud â dysgu ac addysgu a'r Cynllun Datblygu Ysgol.

Camau a gymerwyd o ganlyniad i unrhyw benderfyniadau a wnaed yn y cyfarfod - Ni chafwyd penderfyniad yng nghyfarfod Hydref 2018.

**Rhydd yr atodiad restr o lywodraethwyr yr ysgol, pwy sy'n eu hapwyntio a'r dyddiad y daw tymor mewn swydd i ben.**

### Manylion ariannol -

- **Gweler atodiad sy'n amlinellu datganiad llawn o gyllideb yr ysgol.**

### Sut mae'r ysgol yn defnyddio'r arian a dderbynnir

- Yn gyffredinol mae cyllidebau ysgolion yn faes heriol iawn dros y blynyddoedd diweddaraf ac rydym yn gweithio'n agos iawn gyda'r Awdurdod Addysg er mwyn gwneud y defnydd gorau o'r arian sydd ar gael. Defnyddiwyd cyllideb yr ysgol er mwyn sicrhau'r profiadau addysgol gorau i'r disgyblion ac i sicrhau adnoddau addas ar eu cyfer.
- Mae'r ysgol yn defnyddio cyllid ychwanegol i dargedu llythrennedd a rhifedd.

**Grant Amddifadedd Cymdeithasol** - Mae'r Grant Amddifadedd Cymdeithasol yn cael ei ddefnyddio'n bwrpasol er mwyn diwallu anghenion disgyblion penodol, trefnwyd adnoddau a staff ychwanegol i gefnogi a chodi safonau yn y meysydd yma.

### Rhoddion i'r ysgol

- Derbyniwyd cyfraniadau hael gan y Gymdeithas Rieni sy'n cynnwys nawdd gan fusnesau lleol yn sgil noddi cyngherddau Nadolig a Haf. Mae'r ysgol yn gwerthfawrogi'r gefnogaeth yn fawr.
- £100 – rhodd gan riant o Fl 1

### Lwfansau neu gynhaliaeth i'r Bwrdd llywodraethol

- Costau teithio'r Llywodraethwyr - Ni dalwyd unrhyw gostau i'r llywodraethwyr yn ystod y flwyddyn 2018-19. Dymunaf ddiolch i'm cyd lywodraethwyr am roi eu gwasanaeth yn hollol wirfoddol er budd a lles yr ysgol.

**[Perfformiad yr ysgol mewn asesiadau diwedd Cyfnod Sylfaen a Chyfnod Allweddol 2](#)**

## Gwybodaeth gymharol am asesiadau'r disgyblion ar ddiwedd y Cyfnod Sylfaen a Chyfnod Allweddol 2 – (gweler tabl canlyniadau)

Rydym am weld pob disgybl yn cyrraedd ei botensial ac mae'r ysgol yn bles iawn gydag asesiadau'r disgyblion yn y ddau Gyfnod Allweddol (Gweler atodiadau am asesiadau disgyblion) mae'r canlyniadau cadarnhaol yn adlewyrchiad o waith caled y disgyblion, y staff a chydweithrediad y rhieni / gwarcheidwaid. Mae'r ysgol yn perfformio yn dda iawn o gymharu ag ysgolion tebyg yn sirol ac yn genedlaethol.

### Presenoldeb y disgyblion

Cyfnod	Presennol	Absenoldeb gyda chaniatâd	Absenoldeb heb ganiatâd
Hydref	96.7	2.67	0.64
Gwanwyn	97.08	2.35	0.57
Haf	96.3	2.1	1.56

### Sylwebaeth am bresenoldeb yr ysgol

Rydym yn bles gyda chyfartaledd presenoldeb yr ysgol. Gosodwyd targedau gan y llywodraethwyr am y tair blynedd nesaf er mwyn parhau i wella presenoldeb. Bu'r ysgol yn rhoi ffocws ar brydlondeb yn ystod y flwyddyn, hoffwn ddiolch i'r rhieni a'r gwarchodwyr am ymateb yn bositif i'r ymgyrch.

### Gwella presenoldeb a lleihau absenoldebau anawdurdodedig

Mae'r ysgol yn dilyn camau pendant i leihau absenoldebau heb ganiatâd, Mae plant sy'n cyrraedd yn hwyr yn medru effeithio ar absenoldebau anawdurdodedig. Mae'r ysgol yn danfon llythyr i rieni i bwysleisio prydlondeb ac i dynnu sylw at y sefyllfa lle mae rhai yn cymryd gwyliau yn ystod tymor yr ysgol. Mae'r ysgol yn cysylltu gyda rhieni / gwarcheidwaid lle mae lefel presenoldeb yn isel neu'n anghyson.

### **Targedau ar gyfer presenoldeb**

Targedau presenoldeb am y flwyddyn addysgol 2019-2020 - 96.7%

Targedau presenoldeb am y flwyddyn addysgol 2020-2021 - 96.7%

Targedau presenoldeb am y flwyddyn addysgol 2021-2022 - 96.7%

Plant sy'n gadael yr ysgol ar ddiwedd Blwyddyn 6 – mae disgyblion ar ddiwedd Blwyddyn 6 yn trosglwyddo fel arfer i ysgolion uwchradd y dref sef Penweddig a Phenglais. Eleni aeth 41 i Benweddig, 1 i Benglais ac 1 i Goleg Llanymddyfri. Mae gan yr ysgol bartneriaeth bositif gyda'r ysgolion uwchradd ac yn gweithredu cynlluniau pontio effeithiol. Dymunwn yn dda i'r criw fydd yn trosglwyddo eleni.

### Meithrin cysylltiadau rhwng yr Ysgol a'r Gymuned

Y mae'r ysgol yn un o brif sefydliadau'r dref ac yn rhan annatod o'r gymuned leol. Mae'r ysgol yn gwneud defnydd arbennig o adnoddau lleol gan gynnwys y Llyfrgell Genedlaethol, Y Brifysgol, Canolfan Hamdden, Canolfan y Celfyddydau a'r ysgol uwchradd leol. Bu'r ysgol ar nifer o ymweliadau addysgol gan gynnwys Castell Henllys, Ffermydd lleol, Glan-llyn a.y.b. Bu'r ysgol yn perfformio i fudiadau lleol ac mae cefnogaeth dda iawn i'r ddau gyngerdd mawreddog blynyddol yng Nghanolfan y Celfyddydau.

Cynhaliwyd gweithgareddau er mwyn hybu dealltwriaeth o godi arian at achosion da yn ystod y flwyddyn. Casglwyd symiau hael ar gyfer Plant Mewn Angen. Mi fydd gweithgarwch Eisteddfod Genedlaethol Ceredigion 2020 yn darparu nifer o gyfleoedd i ddisgyblion ymwneud ag agweddau cymunedol pellach.

### Cymdeithas Rieni ac Athrawon / Cyfeillion yr Ysgol

Hoffwn ddiolch i'r Gymdeithas Rieni ac Athrawon a holl gyfeillion yr ysgol am eu cefnogaeth yn ystod y flwyddyn. Mae'r Gymdeithas Rieni ac Athrawon yn weithgar a brwdfrydig iawn ac yn llwyddo i gynnal

amrywiol weithgareddau i godi arian tuag at brynu adnoddau ac i drefnu achlysuron cymdeithasol gyda nawws deuluol Gymreig iddynt.

Cynhaliwyd gweithgareddau drwy gydol y flwyddyn gan gynnwys Ffair Lyfrau, Cyngherddau, Disgo Dwynwen, Prynawn Coffi, Noson Gymdeithasol / Barbeciw a Thaith Gerdded Noddedig. Mae datblygu adnoddau addysgol a darparu ystafell ychwanegol ar gyfer cefnogi disgyblion ADY wedi bod yn ffocws i gyllid y Gymdeithas Rhieni ac Athrawon yn ystod y flwyddyn. Bydd adroddiad llawn o'r gweithgareddau a'r arian a godwyd yng nghyfarfod blynyddol y Gymdeithas Rhieni yn nhymor yr Hydref.

Cyfarfodydd Rhieni / gwarcheidwaid - mae yna bartneriaeth ragorol yn bodoli gyda'r rhieni. Yn ystod y flwyddyn

Trefnir;

- Cyfarfod blynyddol y Gymdeithas Rhieni ac Athrawon.
- Nosweithiau agored bob tymor a gwahoddiad i'r rhieni / gwarcheidwaid i ddod i'r ysgol ar ôl derbyn adroddiadau eu plant ym mis Gorffennaf.
- Gwahoddiad i rieni /gwarcheidwaid ddod i brynawn agored yn yr ysgol.
- Gwahoddiad i fabolgampau'r ysgol.
- Cynhelir dau gyngerdd mawreddog y flwyddyn (gyda thua 800 yn mynychu bob tro).
- Cyfarfod ar gyfer rhieni / gwarcheidwaid plant y meithrin sydd am gychwyn yn yr ysgol.
- Cyfarfod rhwng rhieni / gwarcheidwaid plant sy'n derbyn cefnogaeth a'r athrawon arbenigol.
- Mae'r pennaeth yn nodi ar bob llythyr "os oes gennych unrhyw bryderon am addysg eich plentyn yna cysylltwch â mi ar unwaith"

Defnydd o'r adeilad / campws - Cyfarfod rhieni ac athrawon yr Ysgol Gymraeg, rhai timau pêl-droed, Yr Angor (papur bro Aberystwyth), Adran Tref Aberystwyth, Cyfarfodydd Cenedlaethol yr Urdd, Eisteddfodau'r Urdd, Gang y Graig a'r Clwb Bridge.

Cysylltiadau gyda'r heddlu – mae swyddogion o'r heddlu yn gweithio'n agos gyda'r ysgol ac yn cyfrannu yn bositif at weithgareddau addysg bersonol a chymdeithasol. Mae'r heddlu yn trafod gyda'r Cyngor Ysgol ac yn cynorthwyo gyda'r drafndiaeth ger mynedfa'r ysgol.

Cynnydd ar Gynllun Gweithredu'r Ysgol (ar ôl arolygiad)

Mae'r ysgol yn gweithredu'r Cynllun Gweithredu yn dilyn adroddiad Estyn 2016. Dyma grynodeb o'r datblygiadau.

<b>Disgrifiad/gweithgaredd/cynnydd</b>	<b>Cynnydd</b>
A1 - Sicrhau bod y ddarpariaeth ar gyfer datblygu medrau technoleg gwybodaeth a thechnoleg (TGCh) disgyblion yn adeiladu'n fwy systematig ar y rheini y maent eisoes wedi eu caffael	Rydym bellach wedi <b>cynllunio llinyn 1, 2 a 3</b> y FfCD ar draws yr ysgol ac wedi adnabod cyfleoedd i'r disgyblion ddatblygu eu sgiliau yn fwy systematig. Mae amserlen iPad newydd wedi ei greu sy'n caniatáu gwell defnydd ohonynt ar draws CA2. Er mwyn ymateb i ofynion newydd y FfCD, mae'r athrawon wedi bod yn defnyddio j2e er mwyn rhannu gwaith cartref a negeseuon pwysig. <b>Ymateb i argymhelliad ôl-arolwg Estyn</b> Rydym yn y broses o greu taflenni asesu i'w rhoi yn llyfrau'r disgyblion er mwyn sicrhau bod pob disgybl yn ymwybodol o'r sgiliau TGCh sydd eu hangen arnynt. Bwriad y taflenni yw rhoi'r cyfle i'r disgyblion adnabod eu cryfderau a'u gwendidau ac er mwyn adnabod y sgiliau TGCh maent yn eu caffael yn ystod y gwersi ac ar draws y cwricwlwm.

## hunan arfarnu a Chynllun Datblygu Ysgol

### Prif flaenoriaethau'r ysgol

1. Codi safonau llythrennedd grwpiau penodol o ddisgyblion ar draws yr ysgol.
2. Codi safonau Rhifedd grwpiau penodol o ddisgyblion ar draws yr ysgol.
3. (Estyn 2016) Sicrhau bod y ddarpariaeth ar gyfer datblygu medrau technoleg gwybodaeth a thechnoleg (TGCh) disgyblion yn adeiladu'n fwy systematig ar y rheini y maent eisoes wedi eu caffael
4. Datblygu sgiliau ac ehangu gwybodaeth yr holl staff i weithredu yn unol â gofynion y mesur ADY newydd
5. Adeiladu ar y gwaith da sydd eisoes wedi digwydd er mwyn datblygu rolau'r UDRh

Mae'r ysgol wedi gwneud cynnydd da i ddatblygu agweddau'r Cynllun Datblygu Ysgol yn ystod y flwyddyn flaenorol - gellir cael copi llawn o'r CDY gan y pennaeth.

### Gwelliannau a osodwyd gan y Corff Llywodraethol ynglŷn â pherfformiad y disgyblion

#### Targedau ar gyfer y tair blynedd nesaf

Gweler y targedau ar gyfer nifer y disgyblion fydd yn cyrraedd deiliant 5 neu'n uwch yn y Cyfnod Sylfaen a lefel 4 neu'n uwch yng Nghyfnod Allweddol 2 am y tair blynedd nesaf. Mae'r ysgol yn gosod y targedau yma yn sgil y wybodaeth bresennol sydd gennym am y disgyblion yn ôl asesiadau athrawon blynyddol. Yn ogystal â hyn rydym yn gosod lefel o her ar gyfer y dyfodol er mwyn codi safonau yn barhaus.

	Haf 2019	Haf 2020	Haf 2021
Cyfnod Sylfaen	100% (cyfartaledd DCS)	98%	98%
Cyfnod Allweddol 2	98% (cyfartaledd DPC)	98%	98%

#### Sylwebaeth

- Mae'r ysgol wedi gwneud cynnydd da o safbwynt asesiadau'r disgyblion yn y ddau Gyfnod Allweddol.
- Mae'r canlyniadau yn adlewyrchu yn bositif ar y targedau heriol a osodwyd pob blwyddyn.
- Yn dilyn asesiadau cyson a nifer o brofion nodir pa lefel / deiliant y mae pob plentyn yn cyrraedd erbyn diwedd y flwyddyn. Ceir cysylltiad agos rhwng athrawon er mwyn cymedroli lefelau ac adnabod y ffordd ymlaen i'r plentyn unigol.
- Mae plant yn derbyn targedau cyson mewn Iaith, Mathemateg, Gwyddoniaeth a Saesneg yng Nghyfnod Allweddol 2.
- Fel ysgol rydym yn anelu i sicrhau bod 98% o blant yn y Cyfnod Sylfaen a 98% o blant Cyfnod Allweddol 2 yn cyrraedd y lefel / deiliant disgwylidig (deiliant 5 neu'n uwch ar gyfer y Cyfnod Sylfaen a lefel 4 neu'n uwch ar gyfer CA 2).
- Rhoddir adroddiad manwl i bob rhiant ar ddiwedd y flwyddyn a bydd nosweithiau agored cyson a chyfle i drafod yr adroddiad diwedd y flwyddyn.

#### Diarddel Plant

Dim gwaharddiadau

Adolygu Polisiâu a strategaethau'r ysgol - mae'r ysgol yn adolygu polisiâu yn gyson er mwyn sicrhau'r ddarpariaeth orau ar gyfer y disgyblion. Yn ystod 2018-19 adolygwyd holl bolisiâu'r ysgol ac yn benodol y rhai sydd yn ymwneud ag iechyd a diogelwch, diogelu plant, bwlio, a rhai agweddau cwricwlaidd. Mae copïau o'r

polisiâu ar gael o'r ysgol neu ar y wefan. Mae'r rhestr o'r polisiâu sydd wedi eu hadolygu yng nghofnodion y llywodraethwyr ger y brif fynedfa.

Gweithredu ar ôl adolygu polisiâu - Mae'r datblygiadau yn cael eu monitro'n gyson yn y cyfarfodydd tymhorol. Mae staff o'r ysgol wedi derbyn hyfforddiant pellach ar ddiogelu plant a gweithredu gweithdrefnau ysgol awtistiaeth gyfeillgar. Mae'r ysgol wedi gwella diogelwch drwy wella'r ffensys sydd rhwng yr ysgol a'r ardd natur.

### Chwaraeon a Gweithgareddau Allgyrsiol

Mae'r ysgol yn darparu amrywiaeth o weithgareddau chwaraeon ym mhob agwedd o Addysg Gorfforol. Mae'r disgyblion yn meithrin sgiliau a phrofiadau o'r Meithrin i fyny at Flwyddyn 6. Mae'r ysgol yn profi llwyddiant ar lefel genedlaethol ac yn 2018-19, llwyddwyd i gyrraedd safonau uchel yn rowndiau cenedlaethol mewn nofio, trawsgwlad, rygbi, pêl-droed, gymnasteg, pêl-rwyd, hoci, athletau a chriced. Bu ychwanegu gweithgareddau beicio a scwtera pob dydd Gwener yn weithgareddau poblogaidd llynedd. Mae yna raglen allgyrsiol eang sy'n anelu at foddio diddordebau holl ddisgyblion yr ysgol. Cynhelir Clwb yr Urdd yn wythnosol lle mae staff yr ysgol yn gwirfoddoli i gynnig gweithgareddau amrywiol i'r disgyblion. Mae'r gweithgareddau yng Nghyfnod Allweddol 2 yn cynnwys chwaraeon, clwb rhedeg wythnosol chwys trabŵd, clwb celf, clwb gymnasteg a chlybiau gweithgareddau amrywiol ar gyfer y Cyfnod Sylfaen. Mae'r ysgol yn cefnogi gweithgareddau hoci gyda chyngrhair y Mini Minor pob nos Wener. Mae cysylltiad cryf yn bodoli rhwng yr ysgol â mudiad yr Urdd ac mae disgyblion yn cael profiadau cyfoethog wrth ddilyn rhaglen o weithgareddau'r flwyddyn. Pob blwyddyn mae staff yr ysgol yn paratoi disgyblion ar gyfer yr eisteddfodau cylch, rhanbarthol a chenedlaethol ac yn profi llwyddiant mewn amrywiol feysydd ar lefel genedlaethol. Mae'r ddau gyngerdd a gynhelir yn y Neuadd Fawr yn boblogaidd iawn gan y rhieni a'r gymuned.

Eisteddfod yr Urdd - Bu criw mawr o ddisgyblion yr ysgol yn cystadlu yn yr Eisteddfodau cylch, rhanbarth a chenedlaethol. Yn Eisteddfod Genedlaethol yr Urdd Caerdydd a'r Fro 2019. Llwyddwyd i gael amrywiaeth o wobrau – 1af - Dawnsio Aml-gyfrwng, 1af Celf / Gemwaith, 3ydd Cân Actol, 3ydd - ffotograffiaeth du a gwyn a 3ydd ffotograffiaeth lliw. Hoffwn ddiolch yn fawr iawn i'r holl ddisgyblion, staff a rhieni am ei gwaith caled yn ystod wythnos y Sulgwyn. Hoffwn ddiolch i'r holl hyfforddwyr am eu gwaith ac i'r rhieni am bob cydweithrediad a chefnogaeth.

Bwyta ac yfed yn iach – mae'r ysgol yn hybu iechyd y disgyblion ac yn awyddus eu bod yn magu patrymau iachus o fwyta ac yfed. Mae cinio ysgol iachus yn cael ei ddarparu yn ddyddiol ac anogir disgyblion i fwyta pecynnau bwyd iach i ginio. Mae'r siop ffrwythau ar agor yn ddyddiol ac mae digon o ddŵr ar gael i'r disgyblion, anogir pob disgybl i ddod â photel blastig bwrpasol ar gyfer ei llenwi yn ystod y dydd. Mae cwmni creu ysgytlaeth Blwyddyn 3 wedi datblygu llaeth ar gyfer y disgyblion yn achlysurol yn ystod y flwyddyn.

Newidiadau i Lawlyfr yr ysgol – Mae'r llawlyfr yn cael ei adolygu a'i ddiweddarau yn dymhorol. Mae copi o'r llawlyfr ar gael ar wefan yr ysgol neu drwy law'r pennaeth. Bu newidiadau i gynnwys y llawlyfr yn ystod y flwyddyn gyfredol er mwyn gwella'r diwyg.

[Dyddiadau'r tymor ar gyfer y flwyddyn](#)  
(gweler atodiad)

### Diwrnodau cau HMS

Medi 2il a'r 3ydd, 2019, Hydref 25ain 2019, Ebrill 20fed, 2020

### Amserau Sesiynau

	CA 2	Cyfnod Sylfaen	Meithrin
--	------	----------------	----------



Cychwyn yr ysgol	9.00	9.00	9.00
Egwyl bore	10.30 – 10.45	10.30 – 10.45	10.30 – 10.45
Cinio	12.00 – 1.00	11.45 – 1.00	11.50 – 1.15
Cychwyn y prynhawn	1.00	1.00	1.15
Egwyl y prynhawn	2.20 – 2.30	2.20 – 2.30	2.20 – 2.30
Amser gorffen	3.30	3.30 (Bl 1 a 2 ) 3.20(Derbyn)	3.20

### Cwricwlwm a threfniadaeth addysgu

Mae'r ysgol yn un o ysgolion arloesol Cymru ac yn gweithredu fel sefydliad sy'n rhannu arfer dda ac yn arloesi ym myd addysgu a dysgu. Mae ansawdd ac amrywiaeth y profiadau dysgu a ddarperir i'r disgyblion ar draws yr ysgol yn bwysig iawn i ni. Cynigir cwricwlwm eang a chytbwys sy'n cwrdd â'r holl ofynion statudol. Mae'r athrawon yn parhau i adolygu'r cwricwlwm yn sgil datblygiadau newydd. Mae pwyslais mawr yn cael ei osod ar ddatblygu sgiliau cyfathrebu, sgiliau rhif, sgiliau TGCh a sgiliau meddwl. Mae'r ysgol wedi cydweithio yn agos iawn gyda Phrifysgol Aberystwyth ar gyfer datblygu rhaglen o brofiadau cyfoethog i ddarpar athrawon y dyfodol.

Anghenion Dysgu Ychwanegol Mae'r ysgol yn gwneud pob ymdrech i sicrhau fod pob plentyn yn teimlo'n rhan annatod o fywyd a gwaith yr ysgol ac yn cyflawni eu potensial fel unigolion. Mae'r ysgol yn adolygu'r polisi Anghenion Dysgu Ychwanegol yn rheolaidd er mwyn sicrhau cefnogaeth addas i ddisgyblion.

Disgyblion sydd ag anableddau Mae campws yr ysgol wedi ei addasu'n gyson er mwyn rhoi mynediad rhwydd i ddisgyblion sydd ag anableddau, gosodwyd rampiau i hybu mynediad i ddosbarthiadau a llwyddwyd drwy gynllunio gofalus i blethu plant ag anableddau yn llawn i gwricwlwm yr ysgol.

### Categori iaith yr ysgol – Ysgol Gymraeg benodedig

#### Defnydd o'r Gymraeg yn yr ysgol

- Defnyddir y Gymraeg yn y Cyfnod Sylfaen a Chyfnod Allweddol 2 fel y brif iaith ym mhob rhan o waith cwricwlaidd ac allgyrsiol yr ysgol. Cyflwynir Saesneg i ddisgyblion ym Mlwyddyn 3.
- Y Gymraeg yw iaith gyfathrebu naturiol yr ysgol.
- Nid oes unrhyw gyfyngiad ar ddefnydd y Gymraeg yn yr ysgol, hyrwyddir y Gymraeg ym mhob agwedd o fywyd a gwaith Ysgol Gymraeg Aberystwyth.
- Mae'r ysgol yn sicrhau drwy gynllunio gofalus fod yna barhad a datblygiad cyson yn y profiadau i ddefnyddio'r Gymraeg yn holl weithgareddau cwricwlaidd ac allgyrsiol yr ysgol.
- Mae disgyblion sy'n hwyr ddyfodiaid i'r ysgol yn medru cymryd mantais o ddarpariaeth y Ganolfan Iaith a drefnir gan yr Awdurdod Addysg yn ysgol uwchradd Penweddig.
- Mae disgyblion yn trosglwyddo i ysgolion uwchradd y dref lle mae cyfleoedd iddynt barhau i ddatblygu eu defnydd o'r Gymraeg. Mae cyfleoedd pontio estynedig ar gael i ddisgyblion sydd angen magu rhagor o hyder yn y Gymraeg ar gael yn ystod tymor yr Haf.

#### Trefniadau a chyfleusterau toiled -

Mae gan yr ysgol nifer addas o doiledau ar gyfer y disgyblion sydd wedi eu cofrestru yn yr ysgol. Mae'r chyfleusterau yn cael eu glanhau yn ddyddiol gan wasanaeth glanhau'r Awdurdod Addysg. Mae 'Pwyllgor Taclo'r Toiledau' yn effeithiol sef criw o ddisgyblion sy'n gweithio ar ran y Cyngor Ysgol i wella'r toiledau gyda'r Uwch Dim Rheoli. Llwyddwyd i ddatblygu toiledau'r Meithrin yn ystod y flwyddyn.

### Cynnal a chadw'r adeiladau

Mae'r ysgol wedi datblygu caban addysgu ADY allanol ac ardal yr ardd natur yn ystod y flwyddyn. Mae'r Gymdeithas Rhieni ac Athrawon wedi cyfrannu'n hael at y datblygiadau yma.

### Diogelwch

Y mae yswiriant yr ysgol yn caniatáu disgybl i fod yn yr ysgol o 8.45 ymlaen (Clwb Brecwast 8.15-8.45). Yn y prynhawn bydd y plant Meithrin yn gadael am 3.20 a'r disgyblion eraill am 3.30. Cyn hynny mae disgwyl i rieni neu warchodwyr nodi eu presenoldeb yn y swyddfa ger y brif fynedfa.

Rhaid parcio'n ofalus o flaen yr ysgol a pheidio parcio mewn mannau anabl/tacsi nac ar y gwair. Ni ddylid ychwaith barcio ar ffordd ysgol Plascrug oherwydd y peryg o dagfeydd traffig.

Mae diogelwch yn bwysig iawn i'r llywodraethwyr, yr Uwch Dim Rheoli, y Cyngor Ysgol a'r staff. Rhaid bod yn ofalus a pharchu eraill.

Datblygiadau diogelwch yr adeilad – mae adnewyddu'r ffens sy'n rhan o ardal yr ardd wedi gwella diogelwch ac yn atal mynediad i ddiethriaid.

### Torri i mewn

Ni chafwyd yr un achos o dorri i mewn i'r ysgol yn ystod y flwyddyn academiaidd yma.

Gobeithio eich bod wedi cael budd o ddarllen am ddatblygiadau'r ysgol brysur hon. Cofiwch gysylltu gyda'r Pennaeth os ydych am wybodaeth bellach am ddatblygiad yr ysgol.

Diolch i chi eto fel rhieni am eich ymrwymiad i'r ysgol, mae eich cefnogaeth yn rhan bwysig o ddatblygiad addysgol a chymdeithasol eich plant ac i ddiwylliant unigryw'r Ysgol Gymraeg.

Owain Schiavone, Cadeirydd y Llywodraethwyr